

D P-Faarer vo Därwil

Dr Seiler vo Oberwyl jä dä isch e rächdde Schnäggeschlyffer
Und dr Stöggli vo Eddige als Schattegwäggs jo au nid grad vyl wyffer
Nur dr V vo Därwyl schreyd bsoffe, dasch im Fall kei Gfaasel
Loosed myr verglemmy alli zue: Y bys Blauliecht vo Baasel!

Wie isch jetzt das mit dene vom Oskar synere Buuredschihadischdepartei
Jo genau die wo me kennt mit ihrem grosse M - E - I Umsetzyggsgschrey
Mir frooge uns ganz unbefange, syn si ächt mit däm Donald verwandt?
Druff kömme mir, wyl die trumpeete jo au so umme wie dä Amielefant.

Dr Beizer vom Toscana het bygoscht sy synggend Schiff verloo
Em Edi und sinere Tatjana samt Goofe hän sy d Woonig gnoo
Am Känelmattwäg dien sy d Platane wäge iire flache Wurzle felle
Mir finde: die Politflachwurzler sölle sich doch grad derzue go gselle

Apropos am Biispyl vo dene flachwurzelnde Platane
Do zeigd sich, d' Energiiwändi muess au z'Därwyl aane
D Gmeind isch under Spaardrugg graad au bim Heize
Druum duet siis Verheize vo dene Platane bsunders reize

Bald gits by uns im Dorf, es isch e Schand, kei Maa mee im edle Gwand
Nur no Glochards in Fätze und Lümbbe, wiiso? Das liggd jo uff der Hand
Es isch nämligg eso, s'letschd Hemmli het är gää
Dr For Him good zu, de kasch em nüt mee nää

Filz, Intriige, Liiege, Korruption jä das isch digg
Si mergge scho, s goot jetz um kommunali Politigg
Dr Wolf im Schoofbelz meint, dasch alles nit so draagisch
Und überhaubbt, die Intergga-Affäre e grosse Kaabis

S Landfescht 2017 het me mit viil TamTam lanciert
Sithär isch, soviil mir wüsse, nüm grad viil passiert
Mir schlöön drum vor, Si das wär e Hit, jä gar nyt ooni
D' Gmeind spendiert als Troschtpriis für das Fescht iire Gmeinimuni

Mir lafere do als Duo ganz bescheide numme e paar Bängg
Trotz Voices 99 bikunnt do dr Männerchor rooti Oore, so ne Gschängg
Und dr Kirchechor het au e biz heilige Stress, aber das git Mumm
Dä singt drum als Wältpremiere grad e neus Wiehnachtsoratorium

Joore hän si gstritte, diskutiert, verworfe und denn beschlosse
Denn hän sie vernäämlasst, usgwärtet und noohär s Ergebnis begosse
Schliesslich het au d'Gmeiniversammlig s'Ganzi mehrheitlich gsäägnet
Und denn hets is dä Papirtiger, dr „kommunale Richtplan“ inegränet

Dr Korei am neue Standort, alli wüsses, dä floriert
Ganz anders hets usgsee mit de Woonige im Gviert
Grad im Bau vis - à - vis hets leeri Woonige kaa à gogo
Do hät me doch e eritreischs Begegningszentrum könne lo entstoo

So e Schüttelreim sötte mir scho au no bringe, hän mir uns dänggt
Das Sujet für d Fasnach hän is jo islamischi Fundis gschänggt
Allerdings hän mir uns denn gfrogt, was die Herre ächt het grytte
Will s Nadürliggscht vo dr Wält für e Maa isch doch s Schüddle

Apropos s Händlischüddle syg neuschtens schynts e Form vo Integration
Denn söttsch derzue no d Sproch könne, Geo, Gschicht und Religion
Die Dyssi vom Fasnachtskommittee söt me in sone Integrationskürsli pagge
Näggscht Joor kunnt denn mit e biz Glügg uff d'Blagedde s richtige Wappe